

羅江縣志卷九

邑人李調元雨村稿

人物 有傳三人

明羅江舉人 一 雍原 永樂甲午

二 陳良翰 宏治甲子

三 高 節 正德辛卯

四 吳 瑛 正德丁卯

五 鄭 泗 嘉靖癸卯

明羅江進士 一 陳良翰 宏治十八年乙丑顧鼎臣榜

高 節 嘉靖十一年壬辰林大欽榜題名碑載羅江民籍有傳

羅江縣志 卷九

高節綿州羅江人 見題名碑 簡弟嘉靖十一年壬辰進士及

第第三人授編修署員外郎三十三年甲辰命太子賓

客禮部尚書兼翰林院學士張潮左春坊左庶子江汝

璧為考試官以節與修撰茅瓚編修沈坤彭鳳歐陽暎

等同充房考時潮入貢院三場畢以病死考試惟江一

人而後序則屬同考修撰茅瓚是歲取中瞿景淳等廷

試賜秦鳴雷瞿景淳吳情及第而少傅翟鑾二子汝儉

汝孝俱與焉少傅以嫌故辭讀卷不許既試以進卷呈

上上疑汝儉等在首甲因抑第一卷至第三復抑第三

卷置二甲第四折卷果汝孝也刑科給事中汪蛟王堯

日論劾少詹事江汝璧修撰沈坤編修彭鳳歐陽暎署員外郎高節朋私通賄大壞制科大學士翟鑾以內閣首臣二子汝儉汝孝旣連中鄉試又連中會試若持券取物然崔奇勲乃汝儉等師焦清與汝儉結婣又同受業四人者會試俱一號汝儉汝孝奇勲皆彭鳳所取詩同考官五人何俱在鳳一房歐陽暎亦汝儉等師本同經又改看書經跡若引嫌而陰助鳳尋卷及沈坤之取中陸煒高節之取中彭謙汪一中皆以納賄故有一鑾當道雙鳳齊鳴之謠乞明正其辜且欲追順天鄉試主考秦鳴夏蒲應麒阿奉翟鑾之罪上下其章吏部都察

院從公參看鑾隨具疏自理且請特降題目命部院大臣覆試上怒曰鑾被劾有旨參看乃不候處分肆行擾辨屢屢以真無假爲辭同夏言禁坐轎止罪一人全不感懼敢以撰科文贊元修爲欺朕內閣任重不早赴以朕不早朝並君行事二子縱有軾轍之才豈可分明並用恣肆放僻如此部院其參閱治罪不許回護部院覆請下汝璧于理嚴究分別情罪輕重上以跡弊明顯大壞祖宗取士之制遂勒鑾並汝儉汝孝奇勲清及鳳暎俱爲民汝璧等俱下鎮撫司逮問已法司會訊謂汝璧鳴夏應奇雖各阿取輔臣之子然實非賄故坤之取煒

節之取一中亦然獨彭謙實以校尉張岳賄五百金而中監察御史王珩沈越失於糾察罪亦難逃疏上詔杖汝璧鳴夏應麒六十革職閒住永不敘用珩越降一級調外任節岳充軍謙爲民坤一中煒存留供職

出弇州別集科

考試初嚴嵩之入閣也鑾以資格居其上權遠出嵩下不

平而嵩終惡鑾不能容御史趙大佑劾鑾私同年吏部尙書許讚亦發鑾請屬私書帝皆不問會鑾子汝儉汝孝連捷鄉試會場嵩屬汪蛟王堯日劾其有弊鑾遂獲罪

見史翟明鑾傳

而節亦牽入嵩所屬劾中遂敗

贊曰明世綿州三高齊名皆以文章著科名亦相埒而

羅江縣志

卷九

三

出處畧異高第以詩人自命恬退自得嚼然不污可謂明哲保身矣高簡雖廷杖遭謫旋復起用亦以晚節自修惟節以鼎甲開吾羅爲明三百年所未有然竟以科場事充軍賚志以沒衆論惜之然當嚴嵩撓權之時朝紳無不受其屠毒其事起於嵩傾翟鑾而牽連被害則其不附嵩可知矣受賄之事莫必其有無得無亦如魏忠賢誣熊廷弼行賄以陷楊左諸清流乎小人之害君子何所不至識者察其原委而諒其心可也

童山文集

嘉靖壬辰科是年館選凡兩度以後選者改入平湖人王梅前後皆與焉凡二十一人館元爲呂懷碑作恒建

拜給事蓋用前二科袁袞唐順之例末名兩度俱郭希顏反留爲史官時留者七人而主事至九人皆首揆永嘉意也首甲狀元林大欽年二十二授官尋以酒色亡節授編修而不免遣戍其吉士中受極刑者二人一爲胡守中其一卽郭希顏野獲編

本朝舉人 一 余昌宗順治庚子 五十 曾世愷嘉慶丁卯

二 李化楠乾隆辛酉

三 李調元乾隆己卯

四 錢林虎乾隆庚辰

羅江縣志 卷九

四

五 柴邦直乾隆乙酉浙江仁和人籍

六 劉清乾隆戊子

七 李鼎元乾隆庚寅

八 李驥元乾隆丁酉

九 李本元乾隆丙午

十 曾昌曙乾隆己酉

十一 李朝塏乾隆乙卯

十二 冉玉嘉三十 楊上珍俱嘉慶庚申

十四 余人鳳嘉慶辛酉

本朝進士李化楠乾隆七年壬戌金甌榜有傳

李化楠字廷節號石亭羅江人乾隆辛酉選拔鄉試壬戌進士狀貌魁梧奇偉分發浙江巡撫黃廷璋一見卽器之謂司道曰此將來浙中第一循良也以是上官俱眊目癸酉補浙江餘姚縣令姚邑濱海自上林至闌風七鄉通錢塘橫亘八九十里時有海潮爲患十五年秋七月颶風挾雨大作吹瓦拔木三晝夜不止公戰慄跪庭中祝曰海地窮民甫離災難若天不降康堤潰水溢民其爲魚水旱頻仍罪在長吏願身受罰爲此地民暫延殘喘祝畢卽分役查看水勢天明廟山巡檢俞漣馳報水幾潰隄賴東南風大作潮竟不至人皆以爲公至

誠所感云姚邑賦重民頑爲盜賊出沒之藪公銳意廓清懸賞格追比一時小賊多擒而巨猾依然漏網因思緝權不可專委捕快因密錄難獲猾賊四五人名於票夜喚皂隸李兆民壯婁恩至署出票袖中面諭之曰賊某等現藏某所爾若依限獲受上賞否則革役二役唯唯退不三日積賊景三擒至內外無知者又十餘日逸賊張子顯張文紹陸通儒鄒士元繆允年孫善平等先後就擒審出屢次行竊及賄囑勢豪州同楊某串捕庇縱各實情通詳分別軍流抵罪重賞兆恩二役合邑驚以爲神乃將小賊創立枉生所捐俸給食扃使白新擇

執藝人爲之師量所執大小暫借官錢資之藝旣成乃保釋之人咸感悔終身不復作賊丙子調秀水移署平湖前令積案三千有奇公自立程限每日分辰午申三時訊之時各數事二月盡理去之日平湖民送者萬人頂香跪道以灰塗壁寫七年如雲烟兩月見青天二句大街小巷皆然七年謂前任平湖令瞿天翱也楊公廷璋諗公循卓以知府薦尋丁父憂庚辰服闋進秩司馬署滄州牧州爲四方盜逃淵藪公嚴保甲法稽覈部內丁男年貌按冊搜索鮮有脫者署涿州州方患旱公捐俸煮粥加賑民賴以安癸未補天津海方同知抵任復

以憂歸丙戌署霸冀兩州牧丁亥補宣化府同知駐新保安境亦多盜立查更法由是奸宄屏跡戊子授順天府北路同知兼署密雲縣事是時京師奸人剪辮髮者蔓延數省無佐證比路有張乙者爲讐人誣告公知其冤而 行在慮囚甚急公以獄讞未定拒不發已挂吏議旋經大臣察其實奏請寬免事始解 上行圍木蘭公葡伏道旁 上笑謂扈駕諸臣曰這個大漢可謂強項矣人謂上有嚮用意卽大府益倚重公密雲令任某以事被劾公讞得實矣有齷齪公者力持之而公素肥碩令浙時痰常上迷至是又患怔忡祀竈日以事過都

門購參餌自隨越二日入會城命從者瀾茶忽解所佩  
刃自傷茶至從者驚相呼公躍然起曰吾安得血被手  
耶創未深然亦竟不治聞者皆詫嘆後任某卒以贓置  
重法而力持者亦得罪戍邊衛以去人以是服公神明  
云著有萬善堂稿石亭集醒園錄子二長調元賜進士  
出身改庶吉士授吏部文選司主事甲午廣東副主考  
陞考功員外郎兼翰林院編修提督廣東學政誥封中  
憲大夫官至直隸通永道二譚元太學生

贊曰公以壬申校浙闈得沈君祖惠爲解首儒林多稱  
之要其獲上治民不媿古循吏矣疾由心作天若憇之

然君之沒未幾而忌君者旋以他事敗密雲獄亦卒如  
公所讞報固若斯不爽也抑亦可以無憾矣

年任侍郎  
吳省欽撰

調元字羹堂號雨村十八歲補諸生卽隨先君浙江秀  
水任讀書因在籍食俸大司寇錢香樹先生家居金陀  
坊時至衙署先君呼出拜見以素所作詩文請質先生  
驚曰公子殆非蜀人乃吾浙人也可受業吾門吾當教  
之然吾門生多大老汝遙以吾兒少寇汝誠爲師而呼  
余爲太老師可也自是在金陀坊受業一日見先生命  
諸公子擬作召試詩題春蠶作繭先生命同作調元得  
一聯云不梭還自織非彈却成圓先生閱之大喜曰此

名句也當爲諸卷之首又復批於卷曰憶昔十年前侍  
上于 乾清宮元宵聯句 上思如湧泉言言珠玉  
僕得一聯云風團謝家絮霜點洞庭橙一時王公大臣  
俱推僕爲五字長城固不敢當今見足下圓字一聯與  
前事堪印証也他年成進士入翰林聲名雀起予企望  
之從此以詩學受知於先生春風中盡丁丑一年明年  
戊寅隨先君以艱回蜀從此不獲侍左右然至今未嘗  
忘也又受知于提學洗馬史公屢試第一謂諸生曰吾  
在蜀三年今始見一個秀才也卽日送入錦江書院肄  
業中己卯鄉試第五名辛巳由落卷取中內閣中書補

國子監學錄癸未會試中第二名進士殿試第二甲第  
十一名改庶吉士散館授吏部主事考差第一充廣東  
副主考回陞考功員外郎丙申以議稿塗押爲同司所  
回舒爲先入所中填入浮躁引 見蒙 上詢及軍機  
傳吏部堂官明白回奏尙書武進相國程文恭公以畫  
稿塗押對 上曰司官有不安于心者向例原准不畫  
押如何便填大計程曰是 上問居官何如奏曰辦事  
勇往遂奉 旨着仍以員外郎用卽日到任□□員外  
尙未補缺卽 命提督廣東學政三年任滿回京卽授  
直隸通永道召見勤政殿 上曰 汝乃朕提拔之人



也非朕乾剛獨斷倘在明朝汝能免權臣之害乎汝須謹記朕言在部數月上嘗從容謂相國程文恭及侍郎袁清恪曰李調元能與舒阿爭稿頗有骨氣但性子不好須令改之乃終不自悛在道任甫二年又因參永平府爲府所傷遂罷職遣發伊犁以母老贖罪不作出山想後上問弟鼎元李調元是汝何人蓋聖恩猶在念也然時和方當國遊其門者成羣豫知冰山必敗不肯復謀補官遂毅然而歸豈知家居十八年冰山始敗可以報國而吾亦老矣以邊省之人而受高廟特達之知如此其重誠爲千古罕有終不能勉力向上

羅江縣志

卷九

九

每一念及惟有淚涔涔而已聊書于此以示後世子孫  
世世以報國爲念無令我長抱終天之恨也

李鼎元字墨莊由廩生中庚寅鄉試戊戌會試殿試第三甲第一名進士改庶吉士散館授翰林院檢討改授內閣中書己未八月十九日命李鼎元至琉球國偕正使太湖趙文楷充冊封天使賜正一品麟蟒服庚申過海辛酉春回朝復命陞宗人府主事

附鼎元琉球異夢記

詩有夢中得句者率多懍恍難解然竟有卒得其解者余弟墨莊戊午八月十九日奉命冊封琉球紀

恩詩有廿年舊夢肯迷因句自注云甲辰九月以假遊浙夜夢過海作詩覺而忘之惟記有雲養淡螺深句頗自得意而未得其解余讀之亦覺茫然欲查典故而書樓已燒無可校正今年壬戌六月二十五日冉甥玉嘉自京回墨莊抄寄所作右旋白螺記云右旋白螺者西藏入貢供器也乾隆丁未春 上命大學士福康安勦臺匪林爽文 賜此螺時余方在翰林修國史得恭讀 高宗純皇帝御製右旋白螺贊謂微物而能測天攜以過海吉祥安穩心竊誌之後數月捷音至言舟行往來順利此螺遂奉 旨留貯

閩督署備渡海用嘉慶四年己未琉球國王尙溫以其祖尙穆喪來告請襲封例遣使余時官中書適在選八月十九日引見得 旨貳修撰趙文楷以行庚申二月出都四月抵閩中丞汪公志伊齋螺至云 皇上命督臣玉德奉許供奉封舟乃望 闕謝訖啓 鑰審視螺長五寸六分參之數得天地之中和圓腹混沌象太極首尾各長二寸象兩儀旋四折而止象四象螺皆左旋此獨右者以陰承陽迎天行也膚嵌寶石八合八卦數色配之襲雲錦五重重一色取五行相生義所以養之也藏以金匱而無極之理備焉

蓋造物者生是非偶也先是乾隆甲辰余假歸九月四日泊舟溫城下夢航海樓船巨麗旗幟飛揚風浪拍天擊節爲詩醒記雲養淡螺深句並舟牌書免朝字舉以問人無知者以夢也置之及使命下檢同鄉海山先生琉球志畧封舟圖有免朝字已驚前夢驗豈復料白螺之命能使十七年夢中之句字字有着落哉五月七日自閩開洋十二日抵中山十月二十五日自中山開洋十一月朔日歸閩去來皆六日竊惟琉球自前明迄今冊使往來三十有餘次徃往中流猝遇颶颶檣傾舵折甚者觸礁破舟此行獨邀

順利與福公後先一轍謂非白螺之神曷克致此五燈會元謂廣南有鎮海明珠者殆此螺之類歟並寄接到白螺恭紀二首卽以夢中句爲起句云雲養淡螺深居然夢可尋光華瞻口月靈異測陽陰定海風癡避降龍佛法欽波濤知不起止水是臣心雲養淡螺深光涵八寶沈貯霞囊是錦捧日匱爲金已佐將軍績重煩聖主心不才叨異數何以靖微忱夢之足徵如此前因之說信不誣也誰謂不可解乎

雨村詩話

補遺

李驥元

乾隆甲辰殿試茹芬榜有傳

李驥元字其德號鳧塘羅江人生不好弄天性愛書甫四五歲見羣童入塾卽跟隨不回父香如尋歸問之則曰我亦欲讀父曰汝能識字乎對曰先生教彼認書我從旁聽之十已記其八矣試之果然父竒之遂留自課南村有龍神堂在大溝北中有文昌宮每年二月初三日誕會演劇闔村士女無不聚觀弟獨絕跡不出父憐其體弱恐勞瘁成疾誑令出觀不得已隨去隔溝而望仍挾一書且看且讀及父至劇場回視之則已回塾矣人皆以爲異時戊寅余隨先君自秀水丁祖妣艱歸先君命余在環翠軒課弟譚元而香如叔亦令鼎驥兩弟從

學舉業惟弟年幼苦讀未弱冠而文已如成人然是年值羅江彙童滿擬縣覆居首未幾榜發則見驥一人回問之哽咽不言淚如雨下乃知首覆無名因慰之曰觀汝志氣如此必不久居人下也次年卽由縣州院連取三案首入庠學憲南滙吳冲之愛其文深器之弟初名繼公親筆改爲驥曰汝千里駒也勉之自是歲科屢試第一丁酉遂入選拔中鄉試第五名經魁余時亦提學廣東聞之喜曰此可繼先君及余之故步也次年戊戌又聞弟鼎元中進士以三甲第一名改庶吉士又喜曰此可繼余館選之故步也是科弟雖未第而鼎授館得

檢討家聲由是日起人皆榮之余曰未也須得編修乃  
慰我心耳必得者其在驥弟乎又三年余由廣東學政  
任滿回京補授直隸通永道因接二弟在署甲辰會試  
余與鼎住內城看榜見四川進士額止二名弟與巴縣  
張錦與焉一時榜下譁然曰皆讀書種子也我輩不第可  
無恨矣殿試二甲改庶吉士後三年散館竟得編修于  
是三翰林之名噪天下大總裁兵部尙書獻縣紀曉嵐  
先生謂諸王公曰吾今科所取皆讀書人而首推者實  
雨村之弟驥元也吾昔皆二甲未得編修今不缺矣成  
吾志者子也時香如叔亦自山東泰安令弟婦兄何人

麟署聞信回京相見於通歡燕竟日余時亦將歸里臘  
月初五爲余誕辰弟曾作詩二首祝壽餞行送至葫蘆  
頭各灑淚而別丁未兩弟丁叔父艱始得回里相見然  
一白楚北來一自粵西來雖喪費稍支而萬里千山風  
塵碌碌已苦不可勝言矣居半年惟與父老閒話桑麻  
絕口不談溫室樹生平不喜應酬在京亦不多赴燕會來  
川典試編修溫汝适順德人爲會試同年榜後道過羅  
江見訪已行至祠堂蓋欲兼觀醒園也弟既不迎迓亦  
不脩餐溫悵然而去後吾弟聞之若不知也服闕至京  
此後遂與弟不復相見矣次年適值乙卯科各省鄉試

考差得頭等蒙 恩差與太常寺卿施朝幹充山東副  
主考回京復 命 召對稱 旨問家世甚悉 天顏  
大喜未幾卽陞左春坊左中允蓋超陞也人皆以爲  
簡在帝心不日將大用王公及掌院等交相薦舉戊午  
大考雖照例仍改編修每逢站班常被 顧問尤爲成  
親王所器賞是年二月二十三日奉 特旨派入 上  
書房行走除夕蒙 上賞賜貂皮等節物隨詣 公門  
叩謝己未年五月初三忽得咯血之疾始猶勉強上  
朝因誤服涼藥遂至不起蓋弟一生讀書之心血至此  
而盡雖身列清華而骨體已枯故臨死而猶不自知也

弟工於小楷每以趙子昂爲法作文簡古似韓柳尤工  
於詩立意學蘓數年前曾以鳧塘稿托余婿張玉溪寄  
余求序其詩亟爲少司寇王蘭泉先生所賞序成寄墨  
莊爲刊行不知刊成否弟天性孝友兄弟和睦從不聞  
家人生產故至今同居無閒童氏張氏生有二子長子  
五歲次二歲俱於弟卒後一年天殤竟無子其存惟張  
氏所生一女而已弟生於乾隆乙亥年七月初二日寅  
時卒於嘉慶四年己未九月二十二日寅時年四十有  
五

贊曰昔王沂公夫婦積德無子每夜禱天願賜一愛讀

書子後夢神人送一子謂曰今以曾參爲汝子後生兒  
遂名曾今弟之好讀母亦天所賜歟雖非三元宰相而  
馳名翰苑幾二十年疊膺 帝眷可謂深矣乃年止中  
壽沒竟無子亦又何哉豈天能生之而不能成之歟抑  
其稟氣之厚薄有以使之然歟嗚呼天道無知真無知  
矣 兄調元撰

本朝副榜 一 郭大有 乾隆辛酉

二 陳 德 乾隆己亥 譚有容 嘉慶戊午

本朝拔貢 一 趙 亮 雍正乙卯

二 李化楠 乾隆辛酉

羅江縣志 卷九 十五

三 李驥元 乾隆丁酉

四 計國成 乾隆己酉

本朝歲貢 一 嚴秉剛

二 陳 註

三 范 昂

四 陳 策

五 石維嶽

六 陳格言

七 冉 睿

八 謝周望

九 計萬安

十 計天禧

十一 鞏建昌 二十 李朝杰 思 貢

十二 陸士彬 三十 陳懷瑀

本朝武舉 一 李應宿 二 張書綸

三 謝應元

四 李彥青

羅江縣志

卷九

十六